

Monumentenfonds orguyoso cu renobacion di Uncle Louis Store ta cuminza



ORANJESTAD (AAN): Den presencia di Ministernan Oduber, Bikker, Romero y miembro di Parlamento Sr. Howell, directiva di Stichting Monumentenfonds Aruba (SMFA), a duna inicio na e proyecto di restauracion di Uncle Louis store pa asina restaura e monumento aki na skina di Bargestraat y Bernard van der Veer Zeppenfeldstraat 7.

E monumento di Uncle Louis Store ta un edificio

construi den añanan cincuenta, diseña pa arkitekto Jan Nagel y construi den un estilo di 'Nieuw Bouwen' tabata pa hopi aña edificio di Uncle Louis Store cu tabata un tienda di bende tela. Na principio di añanan nobenta gobierno a cumpra e edificio y esaki a bira oficina di Aduana. Pa basta aña caba e edificio aki ta bashi y a bira tambe un monumento proteha. Algun tempo pasa SMFA a cumpra e edificio aki

for di gobièrno cu e meta pa restaura esaki back.

E supervision di e proyecto aki lo ta den man di Archiosa cu ta e arkitekto tambe cu a haci e studio historico y diseña e restauracion. E contratista cu despues di e destaho publico na Januari 2019 lo ta encarga cu e ehecucion di e restauracion lo ta Van Kessel Havenbouw NV.

E proyecto ta planea pa finalisa na principio di 2020 y una bes finalisa e edificio



lo bira e oficina di Directie Natuur en Milieu (DNM). Hunto cu DNM a traha riba e proyecto aki cu lo inclui panelnan solar, uso di awa recicla pa e wcanan y un green wall. Tambe den e proyecto aki ta conta cu e guia di FAVI pa por adapta e edificio parti paden pa un trahador di DNM cu ta visualmente incapacita.

Stichting Monumentenfonds Aruba como propietario di edificio lo percursa no solamente pa restaura e monumento aki debidamente pero tambe garantiza un mantencion apropiada p'e edificio door di crea un

plan di mantencion cu mesun estructura cu ta worde implementa na e otro monumentonan cu ta propiedad di SMFA, pa asina nan por ta semper den bon condicion.

Banda di e Watertoren y Nicolaas Store, esaki lo bira e di tres monumento y proyecto cu SMFA tin den e area di San Nicolas for di un total di diestres edificio monumental y tres obheto monumental (p.e. Kalkoven Rancho).

Asina aki SMFA ta sigui duna contenido na e meta pa preserva nos pasado pa futuro.